

寄庵詩文鈔

寄菴詩鈔續六

辛未

寧州劉大紳

元宵

春風御我造天關  
夜月初圓獨自還  
欲摘星辰天上少  
散爲燈火徧人間

夢王秋水

仙人衣袂五銖輕  
到處題詩自紀行  
脩竹深深通一徑  
寒泉碎玉有餘聲

同張金門山中看桃花

辛未

春風潛引人不復閉蓬戶出城二三里年年舊遊處紅  
霞赤雲劃不開一望盡是桃花樹白梨又作香雪飛間  
以穠李矜芳菲可憐世上閒人少相招不來來遽歸與  
我惟有張君耳何當汎汎輕舟裏隨風吹入仙人家看  
罷桃花喫桃子却聞仙人多少年風流我輩今老矣一  
杯濁酒醉且歌樹上芻尼噪不止

### 海棠

曾向屏風見折枝老顛直寫放翁詩春光一樹今如許  
誰按梁州酒醉時

成都風信海棠初何但芙蓉錦不如夢想碧雞坊外路  
欲從花海駕飛車

游春夢

晨風撼高笠午日炙輕裾廐中縱有果下馬安得芳塵  
逐香輿清宵忽騎仙人鹿又到昨日錦繡谷妖童艷女  
歌未周瞳瞳曙光豁睡目大夢宜醒小夢逃天雞夜半  
何須啼風光一住幾千日飛紅不落桃李蹊重門小院  
少關鎖處處仙人知有我一樹花開留一詩歸來大笑  
忙於火

山中四首

山中孔鸞悲城頭烏鳶樂丈夫失雄劍出門安所作春  
風垂楊邊繫馬上高閣開瓊琥珀光傾倒銀鑿落一呼  
項與劉再呼王與葛曠世無英雄窮途有深託顧視白  
日低西山浮雲薄市井多小兒紛紛笑寂寞

舉世譚神仙一死不復見青山仆短碣蛻骨無由銜破  
塚伏老狐月夜戴人面形影空變化千年太陰鍊豎兒  
尙不知火光爭石電謂已簪紱尊咄人衡茅賤身後名  
磨滅幾時得佳傳神仙未足多爾輩又何羨

今古幾詩人聲名塞天壤生存河嶽間歿託星辰上七  
尺生其後夜夢亦勞想緬惟窮居時抱道不肯枉肘見  
復踵決精氣自翫麟流傳千萬篇有時辱罔兩一朝騎  
麟來大笑視吾黨鄭重與詆訶相去踰尋丈

達則爲姬周窮則爲白甫爲郊亦爲仝不爲聾與瞽聾  
者不能聽瞽者不能睹鳳凰謂之雞犬羊視以虎上帝  
生才人一代原可數不在所生中庶能免衆侮耳目汝  
何常吾心得所主悲哉流俗人毀譽徒自苦

牡丹

千兩金酬一萬枝驪山宮裏有花師小園但種三千本  
李鄴侯家借綠絳

詩人邂逅便輝光杜老成都一草堂日日從人乞花木  
如何不肯乞姚黃

短歌

草堂好鳥迎朝暉翠蔓紫籐春四圍名花已開酒未熟  
癡奴酒家賒酒歸酒家老翁索酒債傾箱付與羊裘衣  
將軍告身不易得尋常事耳誰人非開元天子窮歡樂  
三章樂府醉後作楊家趙家絕代無漢宮新粧非戲謔

阿環喜愠原無常錦袍仙人竟落晚興慶池邊沈香亭  
玉顏轉瞬亦寂寞今日花間醉不休明日樽前花不落  
花箋一幅闌烏絲清吟千秋尙如昨

待張金門

去年花間揖趙叟不能食肉能飲酒歸時張叟扶之走  
高懸青眼昂白首今年花枝亦復有張叟或來趙叟否  
張叟趙叟沮溺耦楚狂小子逐其後不避鳳麟避雞狗  
盟心屈指卅年久春風一種何足壽人生難得是良友  
我爲張叟市大斗昔日少壯今衰朽世間美惡莫開口



年年花下好攜手

看花吟

看花且與看洛花欄杆咫尺生雲霞開時春風有德色  
落處春雨同咨嗟一本十千主不晒十本百千客不听  
名士自古多酒狂幽人於今半花隱孤山處士親種梅  
陶令之菊籬邊開二公當年若使見此物不應拔去根  
株全不栽老夫邇來傷遲暮酣酒染衣亦無數掀髯朗  
誦正封詩脂粉何人識好句聞道洛下名園中變幻神  
奇難理窮我於萬事要目睹欲以草木煩天工詩歌編

年不分體留待千秋檢故紙詩好詩惡又何知知道看  
花歲有幾

城下古塚

百鬼城頭哭聲聲雜杜鵑今人如不死古塚復誰憐已  
盡耕犁下還侵道路邊無情是牛馬有觸亦悽然

晚食

椿葉芹根已漸稀不知何日市瓜肥客來笑說南山上  
昨夜東風長蕨薇

少年雞豚厭冰盤水有鱖鯉野有獮老子正宜蠶豆飯

兼旬亦似肉芝難

杜鵑

晨星未沒遶城飛  
日入林深氣力微  
笑爾此來忙不了  
聲聲只是勸人歸

嘲小孫子

杏花成子柳垂條  
上學孫兒懶欲逃  
驀地牽衣啼不住  
門前吹過賣鰲簫

讀書調內

老妻傾耳笑無聊  
冷几寒氈是久要  
一語酬卿卿勿怪

白頭續月坐清宵

道上遇趙敬修

寂寂孤邨外悠悠大道邊聞聲知我輩開口罵時賢獨  
抱琴無用相扶杖有權爲嫌車馬至別思繞春烟

聽鳥

春風鼓萬物生意趁清曉夢回草堂中我亦攄懷抱種  
樹逾十年其上有幽鳥不知語云何入耳但覺好鸚鵡  
學人言取憎病在巧鵬闌解呼名戲謔何足道去年賦  
新詩於汝意傾倒語默固有時春風恨不早年年莫倦

啼爲我娛衰老

蘭

數重門外認香風  
靜對孤根一室中  
寫入畫圖偏愛葉  
人生顛倒是雙瞳

屏跡清吟可忘年  
香縈小閣却沈烟  
山深自是無人問  
擔到街頭值幾錢

聞杞湖藥王廟中芍藥盛開

畫壁爭傳絕句詩  
游人一半酒醒時  
春風開落花多少  
湖外青山山外祠

西望咫尺少雲封不似豐臺路萬重費我芒鞋能幾兩  
朝來錯問葛陂龍

能言喜鵲

毛羽平時尙惜鮮舌如鸚鵡絕堪憐閒言語學小兒女  
好格調偷新管絃傍舍不驚棲夜月繞籬自愛話春烟  
晚看屋角羣飛處空報人家肆客筵

正無鶴語解磨人鸚鵡高飛隴上春水隔深村花寂寂  
竹遮小巷犬狺狺不嫌強聒先傾耳若爲重聽數啓唇  
一曲新歌能和就綠朝雲恐是前身

卽事四首

孟飯杯羹冷墓門楊枝娉嫋不招魂  
春風吹斷黃昏雨餒鬼墳頭盼子孫

高邱破塚對斜陽趙壙陶歌生自忙  
拔宅不留遺蛻在仙岩省却幾黃腸

酒肉如山侈華筵刀光燭影夜相連  
黃金結客惟嫌少不向南山挂紙錢

曉月朦朧日又西病鴟啼倦老烏啼  
北邙一帶傷心處正有穹碑待表題

山中聞鷓鴣

青溪碧嶂訊漁樵坐聽鷓鴣聲寂寥道是此中行不得  
杜鵑山外又相招

寄柯蔭塘

異代遙遙不可稽才名功業本難齊王褒已作賢臣頌  
何又移文到碧鷄

夷風華月渺無邊不記唐年記漢年試上五華高處望  
武鄉祠樹碧於烟

反死鼠行



張君示我死鼠詩讀來終篇心已悲傳聞此災流行久  
廿有餘年無已時朝見鼠死暮人死爲鬼爲鼠那得知  
吞刀吐火呼雷電鞭嘗草木師軒岐一齊束手何能爲  
使人不畏活虺虎但畏此輩橫陳尸老人稚子夜不寐  
嚙聲入耳歡相持太乙貴神有專祠高標燈火如星馳  
天心仁愛帝聽邇穴中先與育鼠子壯哉同雀色更喜  
縱橫耗盡千倉米官私不舉迎貓禮冥靈歲月共迢遞  
君不見唐虞之世遊鳳麟熊羆夢與文王親帝王名壽  
自有真歛時五福敷錫民鼠死之詞不復陳反張君詩

辛未春

憶天游洞

天游洞無人歷不但世間樓閣分仙凡山中巖竇且復  
判喧寂上如穹屋前軒牕三面丹翠立絕壁下平不假  
鋪罽毼旁整何殊疊甌甌飲酣可臥狂可題斜拖烟雲  
繞虹霓山魃木客潛消藏漁郎樵豎不相覲有時笑語  
聲外聞下方驚顧響霹靂初來周遭無路通披荆斬棘  
除蒿蓬天光透出射人目恰得一穴當正東竦身掉臂  
固未可亦難屈膝并鞠躬手捫面仰足先下蛇行龜息

今焉同前人未入讓尻股後人未由躡其中入時徐徐  
起而立急遽便當墜虛空若非此間有絕勝歡喜豈償  
心憂冲我曾歷覽不知數偕游半是黃髮翁迂儒何嘗  
輕性命仙人爲樂無終窮今年少覺筋骨鈍便如遠憶  
蓬萊宮人天相去幾萬里兼有守者罷與熊賦詩聊與  
識幽曲後來攀躡望兒童入之維艱出之易歸袖習習  
携天風人生憤樂類如此不用語冰尋夏蟲還當一揮  
仙茅筆崖端書扁勤磨礪

聽春庚鳥歌

生不願婦女詬誶聲相聞錢刀擊觸飛塵氛但願朋友  
倡復和勝如絲竹縈青雲惜哉此樂不易得相逢世上  
薨蠅蚊依人賴有樹頭鳥去來斷續矜其羣來時相思  
好風日去時賦別通殷勤續時移宮別有調斷時餘韻  
猶成文我方清吟愧不及與作好友能張軍禽經固陋  
佚名字春庚春喜徒斤斤倉庚之巧差相似金衣烏衣  
黃黑分大江南北似無有蒼華山麓昆洱濱飛鳴嘹繞  
春復夏傾聽曉日還夕矚兒童樊籠慎勿設亦莫憎弋  
加榆粉待將招呼我好友雙柑斗酒携爲君

行路

我子身出門我心逐之去常爲風雨憂恐少安樂處歸  
來急問訊不如我所慮親心卽我心名利空相誤六十  
知昨非少壯長行路

憶紅石崖古籐樹

我於紅崖古籐樹愛其鬱怒如龍蛇殷雷擊鼓壁間破  
晴雲劈絮空中擎張君我友亦復愛愛其春風能作花  
垂垂千萼共一杼焜鱗炫甲森爪牙陋邦嘉名少人錫  
望見曲喙呼老鴉草筐竹筥拾未足黃金狼籍汚泥沙

歸來欲覆孔甲醢調燮水火蒸雲霞捋鬚剔耳同有味  
麟鳳脯膾空矜夸少年壯膽酒一斗橫騎背上鞭交加  
絕塵躡景志萬里小視天馬來渥洼有人海上紀八月  
周天一度浮枯槎當時若解御此物傾刻便至銀河涯  
老來涉世豈爲口息駕風馬馳雲車今春緣底不一到  
清夜雷雨常咨嗟恐教一夕化龍去空山柏枯徒枿杈  
籐花籐樹無由見何處去叩龍公家

少女弟墓

女弟墓在母家地上棺敗骨殘而改葬無由耕犁相侵莫敢誰何悔恨終身見

於章句

辛未

七

不種杉松拂暮雲禾麻麥菽亂紛紛  
汝兄前日已衰老  
能得幾時來上墳

清明剪紙一招魂啣食烏鴉聚墓門  
咫尺姨娘孤塚在  
斜風細雨共黃昏

婆婆短碣尙分明中有伯兄題姓名  
太息北山藏愛女  
春烟秋草失佳城

雨

澹烟漠漠濃雲濕野水平田白鷺集  
老農相見語依依  
荷蓑終日雨中立

宿村中

穩臥孤村似蓬島  
夜涼夢短人醒早  
私田雨後別無聲  
閣閣青蛙鳴到曉

雨

城邊爨婦淘粳米  
屋霑傾盆注清泚  
久雨未知禾稼憂  
笑言不汲井中水

刺桐花

紫薇散盡赤城霞  
古廟閒棲一樹鴉  
六月雨中何所有  
浣江橋外刺桐花



桂樹下作

撫摩中庭樹秋氣何氤氲掃除衆臭味車載沈檀薰得  
樹如得士實有知己恩數載歸田後未嘗離衡門時至  
花便發但須培其根跡彼香所至一似不絕人真知要  
自寡徒留攀折痕夜雨聲蕭瑟長空滿行雲相看莫相  
負萬彙自紛紜

調張金門

時厄於犬

先生抱道自幽居取忌當時有誰盧不謂故人招隱處  
到門見影亦趑趄

對菊

歲時如轉轂何以慰平生草木卽師友秋冬殊性情  
美人期欲至濁酒待同傾落落茅檐下疏窗半月明  
不分人與菊澹影共秋風安得百千徑各栽三兩叢  
盡教泉石輩日在酒杯中抗志義熙表未流那許同

聽松

草堂深處午雲還刈稻鄰翁晝不閒酒甕未開茶未熟  
松風一枕度青山

對菊憶故人

辛未

如此清風能有幾黃花況是酒邊開爲東道主時相值  
移北山文竟不來色帶晚烟臨小閣影將秋月上高臺  
愁懷未盡悲歌裏一夜相思夢幾回

寒菊吟

幽人一畝宅遠寄青山曲百歲種蒼松一歲種寒菊年  
歲無久暫精氣各千萬常笑春風多不恨霜雪晚霜雪  
固有時寒菊自有枝洪鈞賦萬物一成不復移弱草世  
所玩勁草人不知寒菊語蒼松惟我與汝同氣候易嬾  
代節操難遽改落落幽人居長共青山在

連宵

連宵刻燭每遲遲  
白月黃花一酒卮  
此日窮愁休說命  
他生富貴不吟詩  
斷垣野草失荒園  
老樹殘蛾迷故枝  
更恨年年秋塞雁  
曾無片影到東籬

田家謠

朝見田家樂暮見田家苦  
田家苦樂不自王處處呼天  
呼父母一夜西北風吹向田間止  
田父語婦子今年幸  
完官倉米鎌刀初停手  
耒耨聲不已肩擔背負如流水  
田父語婦子今年幸不饑欲死  
未知明年可能爾良田

無遺力耕犁卽當始田父語未終門前聲隆隆催租吏  
來騎大馬入門繫馬堂檐下吏是官吏要食肉馬是吏  
馬要食粟吏有餘肉烏攫之吏歸勞苦官不知

上登樓山

無車無馬賦來游無數川原置下頭卽此便窮千里目  
何須更上一層樓雲深絕逕人能到月滿空山客欲留  
只恐高寒難信宿孤村重屋自清幽

戲贈

君愁菊花開我愁菊花落問君花開何事愁重陽往往

風雨作無風無雨俗客來十八八九殘且惡客索酒入  
謀婦婦鬢空酒盈斗客呼羹釜無聲厨下嫗睡不應  
前年花不開風雨無客來今年花欲落車馬日寂寞花  
開花落客勿問明年種菜理荒徑

贈李翁

李家老翁住城北八十二年少人識深山不赴黃花期  
誰能望見翁顏色翁言近來風氣殊匿跡懶向城中  
趨藕花池邊釣鮮鯽得魚才過酒家壚平生畏人如畏  
虎邂逅卽歸閉蓬戶今朝見翁羲皇間周旋不覺日當

午翁雖老至身未衰飄颺領下多黑髭問年始知長以  
倍事之直可兼父師我欲贈翁以白璧石田種玉不盈  
尺我欲贈翁以黃金長門賣賦徒勞心贈翁深秋之寒  
菊黃者如金白如玉清風明月一時有可無新詩爲翁  
壽更三百年寧有翁我亦搖落隨西風世間或許有詩  
在翁之姓氏無終窮

向董竹溪索小年毫筆

青春有客過山村緹封透出烟雲痕  
簾花樹底乍傳聲  
奇光異彩盈庭軒橫披長幅不知數  
虞歐褚薛猝相遇

蠅頭扇面尤難能細看心手兩無拒文人之筆武人刀  
鷗鵲拂拭瑩秋毫懦夫懷鉛試一割豚肩鷄肋徒自勞  
外間不少乞書客不惜縑素惜筆墨尋常殺顰皆雨工  
欲拔一毛豈可得君家大筆如修椽一枝持贈從神仙  
銀毫玉管十萬衆紛紛亂挿珊瑚前蟲饑鼠飽未爲病  
多恐冠裳互爭競秋風空遺雙鯉魚薑芽斂手愧由命  
妓樓僧舍茶酒坊新成粉壁紅泥墻松煤淡淡磨一斗  
毛錐無賴傾皮囊東塗西抹正容易盡署董家竹溪字  
書名敗壞追悔遲君其早與管城計



殘菊

落英餐罷自清吟  
日影悠悠向夕沈  
想到江潭憔悴後  
楚臣正有獨醒心

和望夫石

望夫之山石如珉  
前臨大路後江瀕  
妾心不作江中水  
妾貌不委路旁塵  
山頭一片石不改  
憔悴鬢髮妾前身  
恐郎心意不如妾  
歸來不知石是人

宿玉泉山

今宵自分聽泉遲  
已是前村落日時  
記得嶺頭原有路

如何山外少人知

肩輿南去恨迢迢重到山前舊石橋隔嶺呼僧僧不應  
溪聲一路遠相招

行盡殘雲又一村重尋釣畧到山門泉邊十萬琅玕玉  
換却青松赤柿園

一見幽泉喜欲歌詩才不柰近消磨小亭舊日題名處  
添得寒岩月色多

和雲和月宿深山一枕松聲入夢閒只恐塵心猶未盡  
又隨流水度前灣

翠烟拂地月橫空  
夢泛孤舟島嶼中  
覺後庭軒如積水  
木蘭花樹散香風

玉泉山對月

清晨不出山留待  
今宵月月影蔽岩  
阿月光出林樾古  
寺鐘已動瑣屑星  
盡沒靜坐聽寒泉  
聲色成兩絕念與  
此青山十載成久  
別依依一夕閒相  
對憐白髮來朝卽  
出山回首憶高潔  
安得竟不歸清興  
無衰歇

自然亭瞻呂翁相

仙翁飛來鶴背瘦  
變蒼易元不知壽  
廻翔一世浮埃空

玉屏山麓落木後巨龜負鼎折趾顛化作岩前一石皴  
幽泉古木相因依上有危亭巧結構仙翁大醉眼常開  
視亭如葉石如豆清風拂拂明月多笑說蓬瀛出其袖  
飛來飛去人不知我亦於翁未親覲悔不探穴窺藏書  
悔不登山飲重酎溪流尙在清濁間征衫急與浣塵垢  
明晨重來如有緣乞取鶴毛看世宙

劉節婦 廬氏

丈夫讀萬卷口誦心背之婦人不曾識一字大義凜凜  
終身持白首慰夫九原下青燈課兒卅年時襁褓才離

已成立死者復生無愧詞吾宗節婦有如此兄公相見  
乞吾詩節婦豈藉吾詩重欲以巾幗羞鬚眉君不見歷  
仕五季有馮道長樂猶自誇私恩

遊落崖山失路而返

欲問山中路樵人竟未逢空瞻羸馬首不見舊雲峰泉  
響穿林暗烟飛隔嶺濃前賢題壁處多少綠苔封

道逢酒人

一曲琵琶善解愁醉中人物自風流前村紅葉林深處  
問是誰家舊酒樓

宿村中

暮雨宿村中不謂寒至此四體僵不伸重衾如潑水念  
此與城居相去無幾里世人慕神仙拔宅九霄裏罡風  
晝夜吹鶴氅徒襴褌屈曲氛埃間附熱又可鄙清秋鴻  
雁南春來便北徙不介復不隨以茲悟生理卽當返城  
居又復戀孫子織襁行負之椒盤樂歲始空山賦梅花  
晴園燕桃李止速何有常老夫適意耳

寄董竹溪

雨中傳君歸披衣趨道左門前咫尺地泥深沒及踝故

人迎迓多長揖豈少我喧闐聞輿馬半空燭燈火荒村  
聽寒雞轉愁夜雨大夢見徒相思親見底幾可寒溫何  
足問文章羨帖妥大業與浮名孔鸞異蚌羸急欲窺著  
書箱笈開鑰鎖君去留不住晴雲東南墮悠悠江畔宅  
浩浩仰高臥

### 賦梅花

已知天意十分寒數見梅花亦自寬無雨雪時寧有此  
在風塵外轉相看枝高影向烟中墮清極香從水際殘  
若到前村便却步高人大笑獨憑闌

浣江小橋頭梅花

駘蕩春風信，尙遙花飛一片俗。全消不曾有意，隨流水  
未得無情過。小橋傍道塵空，誰築室，凌寒興在欲干霄。  
眼看車馬紛來往，貪趁斜陽，枉自招。

半坡梅花去小橋不數十步

出游不事按圖行，直以梅花計路程。但有寒香便欲醉，  
能將麗句與同清。當離卽作長亭餞，難忘如聞絕代名。  
回首秋風誰似汝，故人種菊傍茅楹。

寄趙惠立兄弟



疊嶂重巒去不辭  
烟雲過眼竟無奇  
城居只憶山樓上  
白墮黃柑聽雨時

小橋

苦吟驢背日陰移  
拄杖閒行意更遲  
不爲梅花還久住  
小橋流水畫中詩

半坡

時有行客  
炊食樹下

不辭人世路漫漫  
正恐前途雨雪寒  
分與梅花香一半  
半坡樹底解征鞍

欲往西鄰看梅花  
不果

冰綃賣自海中鮫欲繪香風上樹梢難定梅花嫌客未到門不敢遽相敲

尋友人不值

杵臼論交地溪山冷笑人花開門自掩客到室生塵寄興尋幽鳥畱詩附近鄰重來無暇日不是爲逃津

綠萼梅

又見枝頭綠萼開不須月下始徘徊寒塘畱影初無迹晴雪生香別有材命意何祇殊衆木賦形並欲冠羣梅山中得此偏輕視一任移根別處栽

浣江篇

我欲買酒白雲邊，傾倒奚囊無酒錢。  
我欲卜宅青山下，山深何處求神仙。  
高沙雖無好屋宇，蒼松翠竹環良田。  
悠悠浣江水，一曲小橋大橋相接連。  
老人由此入村落，如向畫幅中間懸。  
况今一樹梅花發，正當歲暮晴雪天。  
平生遇物輒留意，春光尙與時周旋。  
鄉風不解倚驢背，輸却唐家孟浩然。  
芒鞋竹杖閒來往，行吟坐嘯將窮年。  
橋頭有路卽大道，落日僕馬紛爭先。  
反裘幾家遠遊子，見之不顧橫長鞭。  
幸逢牧豎呼共語，山城月出空嬋娟。

對花使我獨太息爲賦浣江詩一篇

向李靜齋索得紅綠梅兩枝次日賦謝

索得梅花並出羣強將顏色判烟雲小齋昨夜垂簾坐  
一段寒香更不分

梅花絕句 小橋 半坡

半灣淺水漾清沙容得茅廬便住家日暮寒深還不去  
恐無人影伴梅花

前村有路去遲遲忘却橋頭立久時百讀新詩人不厭  
梅花何但似新詩

又律詩一首用鹽字

絕似詩家格律嚴隨風珠玉倩誰拈  
寒山缺處疏影見老樹枯餘古韻添  
不遇高人總無恨卽當大道亦何嫌  
閒情却笑空中雪未落梅花已撒鹽

再用鹽字一首

正值前宵雨雪嚴林泉寒氣一時添  
香風未動雀先噪花影可吞魚正潛  
如飲醇醪人自醉時尋好句我傷廉  
從今細認梅花意不用追摹昔昔鹽

曉起賦瓶中梅花

銀甕出汲井泉遙重屋浸花冰易消和月待人經一夜  
香風不減似前朝

山家梅花

每隨流水過山家不御蹇驢不御車坐到夕陽牛背晚  
笛聲一半落梅花

寒氣斜侵鶴氅衣山人携酒月明歸落花不恨無人掃  
畱待風來作雪飛

獨游

冰雪經過自有春往來愛此浣江瀕無多嗜好詩兼酒

絕少逢迎影共人醉向梅花吟舊句夢從明月識前身  
道旁咫尺如千里任爾高飛十丈塵

留張柏軒偕游龍洞

柏軒先生前日來未及再宿將辭回我於先生夢想久  
遽別難進離亭杯亦知度歲無幾日尙欲巾履相追陪  
人生會合到處可山川有待終塵埋苦留僕馬今有計  
東南古洞鳴春雷洞中曾著幾兩屐爲導先路年衰頽  
從行後輩心膽壯極力縋鑿生面開得奇險中意方快  
尋幽絕處心不灰預愁徑述藝香識時防獸蟄燃爆摧

天寒汗出如漿水拄杖傾仄重挽推每當舊日欣賞處  
指點刻畫慚非材高文得見兩洞記柏軒有燕子康樂  
洞記乾洞記遊興青蓮才腹中早信有成稿筆研悔不先安排他年  
終能屬好手大書深刻摩層崖

鄧印三遺佛手柑

人言西方佛千手彼岸接引世人久年深恐亦疲津梁  
丈六金臂袖而走屈伸變化爲黃柑滿園橘柚不敢友  
君從何處得其一內充外腴謝枯朽兒童聞餽思飽啖  
老翁意欲浸春酒平生嗜好酸鹹殊甘言羞澁出諸口



邇來又作窮愁詩朱門懸簿盡疾首佛家慈悲是大意  
相援只須醉升斗尙嫌一肢力微弱更求九百九十九  
寄詩孔鰲泉不到鰲泉書到再寄一首

春風今又到空憶去年時作客游山晚懷人度歲遲夢  
中無地隔愁處有心知同是衰頽後情多亦覺癡

寄庵詩鈔續七

壬申

寧州劉大紳

送張柏軒歸後却寄二首

勸君燈下酒不信是離杯  
幾載長思念前宵始到來

溪山猶惜別草木亦憐才  
轉恨春風早江雲作意催

壬申立春

在客臘二  
十三日

亦識從今夢冠裳更不疑  
千秋幾別賦兩地各昌詩嶺  
峻鳥飛倦江清魚上遲  
門前九曲水曲曲寄相思

海棠歌

壬申

北人未見紅海棠恨不生長南雲鄉南人見如不曾見  
轉爲名花恨無香豈知造物有變化厥初分子能主張  
猶如絳灌與隋陸文經武緯分道揚又如施嬙並佳妙  
薦枕豈肯同匡牀洪鈞受責終無已剪裁沈浸經營忙  
近年同聲出衆口且恨甫也無詩章此老貌瘦神愈王  
山川草木生輝光寧知當時少題詠或是後代遺弃藏  
十千買種六載見長公放翁顛而狂嫣然一笑竹籬間  
大勝褚生爲補亡世人且莫恨杜老請與蘇陸參翱翔  
花開日到花樹下酒熟時來酒壚旁不分紅顏與白首

雜坐一詠兼一觴况聞海外輿圖廣名山葩卉紛琳琅  
仙家奴婢亦風雅何曾輕易開錦囊樓船欲到風吹去  
更無暇力披羣芳盡如此花來海外無香無詩總不妨  
戲拈陳言下轉語大北勝耶小南強

北邙

村人演  
劇其間

嫠婦經師盡出門北邙風日正晴暄逢場但唱人間曲  
行樂須憐地下魂碧血森森春草短青燐點點月輪昏  
誰爲鄒衍重吹律百鬼歡騰起九原

續海棠歌

白雲九疊堆牆頭秀如銀屏橫玉樓紅雲一樹臨池塘  
皎如明鏡窺曉粧老夫詩興還未已又逐天半赤霞起  
翻憐朝來閒情多拉雜煩絮聒人耳問誰畱客吟山村  
主人出門客到門詩成自舉兩袖看半是花痕半雲痕  
山中看桃花

一枝坐擁碧牕紗起視深山路不遐萬樹春光全藉雨  
千村秀色盡鍾花多年酒量消僧舍何處歌聲擁妓家  
舊是斜陽衰草地今來五色散雲霞

對梨花短歌

山中茅茨最清雅天寒雨雪紛紛下玉龍銀鳳交互飛  
小視瓊樓雙鴛瓦撒鹽起絮矜高歌不柰率爾詩成何  
一朝陳跡盡如掃昨夜春雨梨花多墻頭低拂屋角見  
山色遙深水清淺東隣密密西隣疎密者同雲疎者霰  
一株獨立風骨殊玉人垂手招吾徒田家種秫善釀酒  
昔日紀叟今不無人生一杯萬事足樹頭花開床頭熟  
興酣底用說歸來山村畱客多草屋笑他大雪人不干  
三日僵臥推袁安何如對床花影亂春鳥不啼春夢闌  
夢中便作白雪賦想到剡溪返棹處適去適來寧有常

歸路忽見桃花樹

看花

正月二十日

荷鍾前村後村近背囊五里三里遙龍吟處處扶風笛  
鳳吹家家弄玉簫自負一鄉爲酒地何知二月是花朝  
醉騎馬上如船穩萬頃紅波送晚潮

官保周歲

吾家世胄何遙遙南來聲華殊寂寥中間三劉一崛起  
至今不見麒麟超外官奔走廿餘載言歸空述祖德在  
不於其身於後人讀書報國心未改築樓城北桐樹根

樓成扁之曰抱孫桂

未谷馥

伊

墨卿秉綬

八分爲大字武安

又楊

楊續

行楷光吾門幼孫近隨山村住我每思之間日去

呱呱才記過門時早見王申歲初度風光蕩漾雲霞窩  
晴靄滿園芳草多酒邊競寫鵲鵲賦花下爭傳棠棣歌  
幼孫嬉戲綵紈上周戈漢印屹相向文房好物亦雜陳  
左顧右盼神爲王直取班管珊珊格欲以毛錐敵劒戟  
書生何必不封侯玩弄繆篆手不釋四圍十萬青銅錢  
揚州跨鶴腰猶纏眼光閃閃斬一視人從今日知他年  
全家環觀喜且詫名士障簾品斯下此孫此祖將無同



忘却好官要笑罵君不見驄馱三日超其母千里名駒  
是龍友又不見乳虎氣概吞全牛一嘯萬壑風颼颼有  
孫如此願已酬何況阿母親扶鳩九十老人看試周

同張金門紅石崖看藤樹孫鳳藻亦至

昨憶石崖古藤樹與憶天游同有詩天游歲晚又重到  
遙望藤樹空相期久衰自揣百無用難逐仙人鞭鸞鳳  
恐教化龍飛上天馳雲驟雨四山動張家老子清且狂  
短褐高屐攀援強天游何厚藤何薄敢不與之共行藏  
螭蛟酒杯香餌餅提携直造舊游境日光下射金鱗開

風吹不落春晝永崖邊尋著真源頭洞口分作東西流  
忽然中間睹怪物安得一時兩黃蚪張公顧我驚不止  
孫卿已到深林裏凝神定視發長嘯此樹無乃卽龍子  
甘霖不作經三旬麥枯豆萎生愁人平時恐汝化龍去  
及今化龍豈非神願爲雲從挾雨走須臾滂沱遍九有  
鸛鵲不死蜥蜴歸功成但酌藤樹酒

承硯竹几

龍尾石磨龍九子天旱汲乾井中水如椽大筆時淋漓  
三尺案頭八尺紙紙長案短舒卷煩硯材山立難轉徙

貧居一力俱樵蘇分無雙鬟侍杖履况聞艷女嬌且慵  
腕弱指纖奉不起荒城昨夜風雨中大龜蹒跚曉未止  
江妃寶來爲我謀截湘江竹制成几其圍十分案之三  
高如之下不偏倚主有僕從君有臣東西南北惟所使  
晴明客至門限穿將迎急遽倒雙屣手持網素冰雪光  
眼看虎龍臥跳比書成大笑還長吁旭顛素狂豈有此  
麝煤兔穎爭言功酬勞如何遺予美世人萬事過輒忘  
硯尙不與况於爾

春夜董竹溪兒過卽去悵然有作

去年鄉村夜雨大我坐待君君已過今宵城市春風微  
君來顧我我欲臥披衣著履嫌遲徊一帶百結翻難開  
不知君亦忙何事定要昏黑才到來生離忘記歲星幾  
相思無處可說起語言雜亂僕從催官柵下鎖行難止  
爲歡轉憶春夢長金烏懶飛上扶桑明明燈花照四壁  
送君出門恨茫茫休言長安萬里道但望三台令人老  
君不見甸尾城南土一堆詩人墓上有宿草

三台山名  
竹溪歸路

所經

李靜齋邀食鰕生

鰕產頭髮  
簪龍潭中

西山山麓泉源清滙處亦襲龍潭名尺量及底丈量側  
針頭魚子從未生青沙散漫白石粲苔藻中間碎雲爛  
分羣戲躍都細微疑似糠粃浮沈半怪哉密箐頭髮同  
自然毫末鍾鱗蟲昨宵天文動箕宿簸之揚之走兒童  
山中主人慣留客鱗鱣鰻鯉輒狼藉鸞刀象箸生厭心  
譚及小鰕遠相索風掀笋笠泥汗鞣赤足浸淫當水涯  
揀金求珠為倍蓰瑣瑣才得升斗佳携來廚中惜如玉  
百指經營日催促酸鹹甘苦調變多蠶白愛辛味始足  
座中盡是常醒人終筵秩秩爲嘉賓酒狂我亦負少壯

但愁咀嚼停逡巡右手揅匕左拂袖傾在盤中尚跳走  
笑看鉞鼻與磔鬚怒張欲共齒牙鬪勞卿生命幾百千  
我輩半日供華筵世間何物不尋樂游衍潭上思他年  
我聞西北海洋外鰕須船桅繫小大饒龍饑蛟望欲逃  
誰能縷切佐魚膾羣生強弱難預知奔波口腹無盡時  
窮山竭海亦何用一菜一肉聊相師

食糟螯

酒中之趣不易得垂涎無腸公子側家居早信無監州  
好以酡顏易衰色人云此物專橫行齰上郭索宵有聲

承筐大類豐侯驪要人能醒更能清我云所語殊不爾  
得全於酒如得水請看骨醉神卻完索枯魚肆那有此  
洞天第一輸醉鄉中山千日爭先嘗飲時我爲後至客  
不飲席間觀酒狂海中兩螯兩山矗與山神鬪神懼伏  
滄溟卽變作糟醅誰能左手恣所欲秀山脚下湖水隈  
稻熟齊趁秋風來和羹雖遜天津產揭甕傾倒鸚鵡杯  
讀書幾人檢爾雅門生議去識亦寡一螯更比一螯佳  
夜深莫照燈火下

俗云燈火  
照則沙

### 觀麥浪

山中騎馬如乘船酒醉便欲船頭眠重峰疊嶂隔湖水  
欲往從之恨無緣風來忽擁千尋浪疑有魚龍結隊上  
清流一曲聽無聲知是來牟互蕩漾平地風波令人鄙  
大田麥浪令人喜南方嗜好殊北方嘗新要待端午始  
老夫對此饒涎生語農早穫天正晴磨篩並作揉和繼  
朝夕飽噉歌昇平農前致詞訴春旱今年收成定減半  
州家夏稅完無期那有餘粒供細飯語農已矣無過憂  
一穗雙歧何處求眼前分明五湖景夢裏去逐鴟夷游

賦田火



山城薪蒸足黔突晨爨易二麥旣登場餘稍任委棄一  
炬萬畝空牧豎逞厥伎重霄黑烟浮大野赤火熾海蚌  
傾明珠百千自姿媚終嫌氣焰小光耀難爲比羣龍奮  
火鬣萬鳥張金翅飛躍無定所施翕乃不啻山中歸來  
晚城頭詫奇異快哉小孺子赤帝供指使因知咸陽宮  
重瞳亦兒戲是時月未出眾星守舍次千仞東山巔野  
燒故相忮區區一寧州有此震天地豈惟田祖喜昆蟲  
失所利腐儒閉空齋微螢燦燈穗不見陸渾山愈是大  
放恣千古幾回火拔幟誰樹幟入城夜鐘動光景畱夢寐

臂痛

登臨山水暫遊戲汗漫不干造物忌幽篁書晦山鬼居  
暗中勦人難擬議當時傾跌如未曾歸來始覺傷左臂  
天陰日暮中心悲一肢沈痛一身累轉思折臂爲三公  
名士半體且快意紛紛全人何太多其脰肩肩那堪視  
男兒右手幸無虞指揮不待左驅使拙哉山鬼苦勞心  
看我大書擘窠字

杜鵑花

青山紅半壁上有杜鵑花野燒爭殘日溪流失淺霞開

當寒食節折到散人家不似小園裏重重裁絳紗

河口

甸河西來無去處五丁震恐蛟龍怒風雷簸弄一夕間  
劈開石峽水東注兩邊巖谷降心從流丹滴翠殊雍容  
崄岈怪石獨倔強勢不爲下相撞春水欲碎石石抑水  
畫爭夜闌幾時止憑空跳出三白龍濤顛浪倒聲喧起  
飛鳶欲墮猿哀吟行人駐馬愁淫淫青山一髮危於綫  
二分足垂竇逡巡山魈覬睨伺人過水怪磨牙一尺大  
老夫但愛境絕奇不曾爲爾心膽破須臾已到平地闊

尚恐此外無此山亟呼輿人且安坐我欲回首重躋攀

題嚴可堂亭前石龍

春風揚塵四十里雷公懶與捕龍子不作甘霖不借騎  
鼯臥誰家屋檐底到來雲氣何濛濛吾今於是乃見龍  
嚴家可堂笑謂我君家所豢將無同平生不解食龍肉  
只種瀟瀟數竿竹有時庭軒舞蛟螭慢罵僧繇畫太俗  
如君亦應愛簣簣葛陂神氣爭飛揚誰知補天剩渣滓  
傾寫怪物成洪荒區區蠃蚌未足數卽論長蚪亦非伍  
四隣一見猶驚人况此貽留自爾祖當年賓客心盡降

才名陸海與潘江李家兄弟並矯矯伯也慈明更無雙  
我詩慚愧探珠手春蛇秋蚓書更醜可堂要我爲長歌  
何但葉公怖欲走雲中未見鱗之而亦似神似空費辭  
最憐君家有真賞寶此石焉同鼎彝男兒嗜好羞瑣瑣  
深山大澤寶娛我座間盡是人中龍恨不早來傾白墮  
觀普文光畫石龍

若云石是龍如何不飛去若云龍是石其勢何奮怒爲  
龍爲石已難分又煩好手入畫譜是日我携普生來自  
東嚴侯張燈設燕華屋中石龍之影落酒盞石龍之神

羅心胸晉生坐久高興發欲以人巧移天工嚴侯平時  
寶其一尚恐車馬填門無虛日何況榻上池邊有合璧  
畫師本絕技圖成自得意畫石莫畫龍我語君須記畫  
石有龍在雲表或見一鱗或一爪畫龍於石失精神泥  
塑木雕豈足道君不見嚴先生話石亭君不見趙秋谷  
談龍錄

題四宜亭

四宜亭中宜四時名流輻輳矜題詩我來正直暮春候  
前途汗雨偏淋漓竹風松風續不斷冷然信得過夏宜

一輪明月三尺雪秋冬之宜尙不知先生高臥五十載  
贏得俗士稱狂癡酒顛書聖無不可撫絃看劍還評棋  
香山禪悅東山妓閒情自謂能兼之盛年聞以好客著  
原嘗春陵未爲奇老來頗殫千金座竹裏避客牀頻移  
幾回下令逐不盡亭軒自與賓朋期平泉園林綠野墅  
主人爲誰客爲誰功名事業半消盡文章萬古風猶遺  
將歸更與發長嘯朱砂箋紙闌粉絲前賢後輩各遙和  
人去詩在長相思

題晉文光畫山水

登臨白晝不曾閒  
半夜燈前暫閉關  
誰信芒鞋初脫處  
解衣又寫米家山

在婆溪逢向八孝廉設膾戲爲長歌

日斜風定江上游  
羨魚結網絲難求  
朝來孝廉欲飲我  
戲言無魚不須留  
江神於我非眷屬  
豈肯輕爲供晨膳  
虛窓涼簟睡夢穩  
忽聞得魚開兩眸  
下床一視喜欲舞  
尺半乍脫香餌鉤  
人持魚腹不放手  
魚奮其尾擊人頭  
急呼饕人莫待餒  
餒擣薑挫桂交相投  
坐間賓客半博雅  
辨類分族勤諮諏  
在湖鱗青在江白  
白鱗味比青鱗優



腹腴甚美莫偏勸腦滿及望香溢流遠行禁酒恐生疾  
調和亦復傾數甌餘人恣噉盡饜飫一時下筯誰曾休  
惜哉我非杜陵老未能長歌贈姜侯團街記取有如此  
不用更訪鮫人舟

上高山絕頂

風搖竹節鞭馳馬到山巔列嶂橫分地高峰直界天倒  
垂巖下樹亂瀉石間泉便欲長來往雲中買數椽

春旱

盈尺甘霖記是冬春深憂旱

慄慄地橫烈日看龜坼

天展長風笑燕慵側上銀鈎宵看月平鋪水簾晝聽松  
身閒不暇歌雲漢也其鄉人祀土龍

雨後

盜賊縱橫雨後稀殘雲一片向西飛水流涸澗鷗爭浴  
草長荒山犢漸肥婦女插秧青簞笠兒童送餉綠蓑衣  
老夫本自閒游慣坐看村農隴上歸

看犁田短歌

一犁之重并十鋤一牛之力兼十夫田中有土勁如石  
大雨滂沛稍融酥一肩抵死向前去不勞從後鞭相驅

日中才得暫休歇，孰聞安望朝與晡。汗流入水人不辨，猶嫌嗜懶長叱呼。鞭之叱之亦不惜，所惜唾罵鄉人愚。年豐豚酒饗田祖，有人道及羸牛無身非麒麟。與白澤但願主伯爲騶虞，東隣前年老烏犍。聞道賣與城中屠。

蚊

天賦趨炎性，乘時盡入城。膏脂圖一飽，痛癢忘羣生。不解藏身術，翻爲得意鳴。老農猶望雨，竟夕混雷聲。

送董竹溪太史北上兼寄家輝山主政春林太史  
前身恨不作詞客，今生悔不爲畫師。寫出河梁執手意。

千秋百世同相思陽關三疊唱未已旗亭有人大笑起  
錦袍玉帶天上遊送神仙行不須此平生報國工文章  
此去和聲鳴鳳凰青雲隔絕蓬蒿徑啁啾小鳥空翱翔  
南風約住別離淚麥釀新成且一醉相期廿載遲遲歸  
沅江橋頭再擁篲

唏噓蹢躅難成聲新翻格調如無情誰知依依惜別處  
落日浮雲班馬鳴丈夫七尺非我有安能委頓兒女手  
忠孝大節當兼之山林淪落讓衰朽可憐君亦成老蒼  
館閣後輩爭低昂承明終須大手筆如椽燭影雙輝煌

新秋月照禁城樹知到蓬萊頂上住若見我家優鳳麟  
爲言病馬怯長路

和蘇鉅山遊慈光寺

逕入松陰出上方羨君半日自常羊樓頭擁鼻清吟處  
對面西山駐夕陽

袖詩歸誦草堂間笑說乞書僧自閒一路空中鈴語亂  
江流東去客西還

五日

齊楚同亡國荆湘俗尙存有文投極浦無酒酬高門半

爲風騷重全因放逐傳五絲纏角黍聊以慰忠魂

哭張金門先生

天道從來與善人元黃初判更無親東門有幾張夫子  
竟不相容久賤貧

太息淩長踪跡疏老依古廟坐教書病歸僦屋長過問  
一日遲來室已虛

追隨杖履遍巖阿君不能歌我獨歌敬弔忠魂遺角黍  
去年猶得共婆婆

黔婁高節渺難師身後悠悠只自知一襲布衣雙肘見

看君含笑入棺時

東西兩叟並高寒誰信先駢螻蟻殘祇恐呻吟一遺老

猶疑數日不相看

謂趙敬修

我愛千秋萬世名牀前欲爲述平生啞然不語頻搖手  
何似峴山碑影橫

生存華屋死荒邱詠建安詩淚更流明日薤歌相送後  
城東有路卽西州

丈人石傲丈人峰有約清秋振短筇鴻雁未來天柱折  
山靈應遣白雲封

慷慨功名負遠圖，衰年意氣未能除。  
寢門只是哭知己，若爲蒼生無處無。

之生之死付洪鈞，公是公非在細民。  
試向深山看野老，大家有淚盡沾襟。

哀白沙溝李叟

名法祖居近溫泉

將死長懷我經年，始得知幾人曾會。  
葬何處可銘碑，風雨能相誤山林。  
枉自悲最憐新浴，後水暖月明時。

夢龐人表

人夢狂猶故龐生，未可誣多人叢指。  
摘獨自飽歡娛，老



不忘求雨

曾佐余  
禱雨

貧常讀荷鉏

余圖存  
其家

買田能幾畝耕

稼錦秋湖

後二日人表書來有湖上  
立書院置膏火田之語

哭曹縣韋映輝石鐵人新城何勲臣張慎徽

天既畱我生蓋並畱我友如何數年間存者十無九前  
日出城東哭我貞毅叟渴塋於禮非執紼西山輒乾坤  
闇無光哀淚濕林藪歸來閉高齋鬱鬱俯白首忽見東  
海書遺以一尺厚開緘疾讀之未及轉笑口鬼燐飛行  
間死魄紙上吼曹縣與新城我曾佩印綬韋石何與張  
兩地鍾其秀豈謂一夕間倏忽喪兩耦方我南歸時歲

次於乙丑弊車無雕輪老馬無善走八月涼風多葛衣  
露兩肘徬徨孤館中難進別離酒張子撫山樓抱病掩  
戶牖何子偕弟昆來折濟南柳韋石更依依送到周家  
口宿晚驚犬雞起早駭星斗人事無常歡同行那得久  
計里將及千東南且分手時時來夢中不辨死與否四  
家不相聞年月知誰某我若再東遊漸少憫老醜嗚呼  
天地心於人易爲敦冥靈與大椿春秋彼何久安得一  
世人萬古遺黃耆誓將從神仙蓬壺骨不朽采藥得長  
生腐儒莫相培

出門

閉戶腐儒願饑寒得高歌一朝馳遠路遙遙復如何高  
領逼虹蜺大雨失陂陀早起窺星辰晚宿傍巖阿豈不  
虞跋涉忠信無偏頗同生此天地獨醒人所呵緬懷千  
古上聖賢又何多飛蝗不越境猛虎不渡河若非適樂  
土息陰少枝柯上堂辭阿母兒去定無他妻孥知我意  
更不淚滂沱浩然出門首天上雲如羅

過故友周耀東里

太息平生友十存三四人歌聲少於哭鬼趣半成隣似

此孝廉里初非岑寂濱重過尋短碣風雨失岫隣

關嶺

無端塞天地已是幾千秋墜石高成屋枯松太蔽牛烟  
雲通一徑風雨判雙流衰老重經此何心說壯遊

題師荔扉大令遺張溟洲太守書及復書稿冊

吁嗟世道何滔滔金石信誓輕如毛吾滇乃有濟南守  
心非公叔論絕交太守之友半天下屈指第一膠漆者  
望江傲吏師先生久要乘車與騎馬去年生還自殊方  
風摧靜樹心摧傷忽聞故人有遺素盈幅苦語臨危長

此事自是後死責往復巨纖爲籌策辟如阿母携阿兄  
依依同返金碧宅雲山杳杳江悠悠路人見之皆淚流  
遺草裝潢忍開讀况我神交廿餘秋先生儒林兼循吏  
山川藉重埋骨地望江雖然似桐鄉肯令縣人篆碑字  
君不見少陵耒陽與偃師殯葬義例相猜疑太白當塗  
有封樹夜夜東山飛靈旗

同楊西園何學漁董石澗由湖心亭過敬忠庵至

五華山

奔走旣已倦湖山好逢迎徒步出闌闌遂令心目清孤

亭去不遠水雲接檐楹故人隱居處解衣任縱橫芙蓉  
雜禾稻四面香風生不有小舟楫曲港無由行古佛不  
可佞神仙亦虛名魚鰕匿深處笑人日營營

傍湖風氣涼却出湖上路葛衣御風輕流汗亦如雨人  
家榆柳多不堪息陰去徑叩古禪關樓閣得小住下望  
見山趾遠近悉奔赴忽憶老漚宮烟雲消何處男兒不  
忠孝富強空自誤昂昂七尺軀造物忍孤負太息歸去  
來詩歌抒情悽

東望五華山丞相祠堂在天威如昨日人去已千載倉

卒未展謁纔香固有待徃來恣眺望今古人幾輩太華  
與昆明名馳四海內湖水淨如練山峰青於黛咫尺卽  
蓬瀛回飈阻津逮安得振衣裾飛上大鵬背一探神仙  
窟洗盡塵俗態

上伯制軍玉亭先生二首

棋聲靜處有書聲更以詩篇寫性情自是 聖朝

賢宰相竟如委巷老諸生轅門寂寂軍皆肅行路蕭蕭  
馬一鳴立德功言期不朽底須采藥上蓬瀛

我甘樵父與耕夫近水遙山只自娛長吏行旌望欲避

上公折簡走相呼源探涑泗千秋合道問崆峒一字無  
安得龍眠真畫史昆華下士寫新圖

石獻文邀同諸君子泛舟近華浦

前年樓船泛瀛海手拾明月弄光彩秦皇漢武甘自欺  
安期羨門究何在壺嶠宮闕紛雲烟鄉園幾許佳山川  
一杯一杓共生死不求飛仙求謫仙汀洲浦漱看不足  
畫圖中間縱雙目昆池寒盟十七載未能傾囊買一曲  
秋風乍到浮雲開積雨洗盡新塵埃牙樯錦纜載歌舞  
石家結客臨水隈出城小住迴塘下一時冶遊儘風雅



水平不知輕舟移第見兩岸馳如馬綠萍灣底停清謳  
入門有僧驚白頭季家背囊不易得吾宗荷鍾風還留  
揖僧拜佛兩堪笑踏梯登樓試一眺有詩未敢憑高題  
直棟橫梁恐壓倒太華山峰舊入雲碧雞金馬難爲羣  
邇來到眼又何小袖中片石渾不分紅流忽似黃河漫  
一尺水高綠楊岸村墟散亂鷗波閒匹馬出沒發長嘆  
湖山如此情猶疑迴舟重燕燈火遲嚴城不止郵亭下  
勝似將軍夜行時

調董石澗

石澗以箋屬寫前  
詩別作詩調之

可是昌黎亦嗜痴論詩竟許到劉父龍文虎脊形原異  
冰柱雪車理或差怪至極時皆叫絕醜從無處即名家  
薛箋鄭重休輕棄付與徐黃寫藕花

星回節上五華山觀火炬

割據唐家與漢家松明虐焰亦堪嗟尙能風氣留千載  
直與星辰照五華遠助餘光驚閃電近分殘影擾棲鴉  
不妨竟夕登高望曉及昆池散彩霞

讀袁蘇亭萍聚吟題後并寄

怒飛老不到天池萍聚成吟數更奇無艱險處難名友

有性情人許說詩心事懷生兼哭死行踪少合只多離  
年來我亦肝腸熱若對吾髯尙遜癡

悵望西南水不流倩誰與作寄書郵故人本自多詩興  
近體今餘幾酒樓能以正聲存老宿可無新釀待交游  
碧雞關外平平道便向高巉艤小舟

寄張小東

移住名山何處村知非柳市卽桃源未爲將相多因嬾  
但學神仙亦自尊種玉田深龍子倦傳書路杳鴈奴喧  
從今不說譚天衍問是畱侯幾葉孫

過商山寺啜薜至湖心亭飲酒

數甌茶味足視日可中時花落鳥飛漫香消僧定遲人  
閒原有興境寂轉無詩湖上狂歌處歸賒酒一卮

題金調庵先生傳後

時從鄉國數耆英友教河西舊有聲盜賊皆憐元漫叟  
兒童爭識邵先生如何史冊傳疑信只以官階作重輕  
賴得炳麟家乘在論文講學盡知名

盜賊前朝勢最橫千秋功罪未分明將軍伏鼠難忘死  
宰相牽羊易得生如此奇材終老佛何人大邑付專城

王中  
曾從天壽山前過落日荒寒野草平

萬香海座中聞宜良汪茂才談張小東遇仙事

神仙有無不可知張君文望吾所師十年不出長春洞  
每恨白日升天遲香海座中逢君友清談如述游仙詩  
遂令主客停杯杓竟席傾聽都忘疲云我張君有道力  
山精海怪無由窺老蛟一夕來鶴拓幻作道士相貽欺  
黃冠往往不識字叩以莊列形爲癡是能讀書千萬卷  
波翻濤湧工文辭平日眼底空一世乍見不覺神爲移  
怪物藏頭不露尾剥有一手鱗之而鄉村賺得稱龍鳳

但說前身是蛟螭樓居百日誓供養七日一雞無鼎鼐  
生吞骨肉舍毛羽鷹鷂食雀遑留皮晴天赤日不快意  
風雷震電心歡怡井中汲水樓中瀉濡染四壁何淋漓  
崢嶸頭角漸流露飛揚專待百日期要將平地作水府  
漂蕩十郡無孑遺書生未授旌陽術雖有利劍安所施  
七七四十有九日徹夜呼號驚路隅四鄰咀呪留不得  
深山大澤聽所之出門向人淚作雨主人亦復橫涕洟  
他年升天失此友鸞啼鶴怨空相思九霄重淵强分割  
魚頭不戴輕別離老蛟去後真仙至庭前五色雲霞垂

老蛟不肯說名姓真仙傳是思邈裔

題洗硯圖

新墨如理融宿墨如欲炫可使墨在紙難教墨留硯  
璿瑜發其光渣滓去無倦想見古人學日新止至善指頭  
成此圖絕技誰獨擅讀罷欲題詩幾輩憤白戰圖中人  
與我相看兩不厭何似石有眼閃閃巖下電

寄答袁蘇亭

屈宋得官如鄭虔盤無苜蓿楊無氈近年清俸餘多少  
要付鄰家作酒錢

傾家結客是憐才竹葉葡萄瀉舊醅  
一自揚雄驚吐鳳無人爲續解嘲來

買得肩輿又買舟碧雞關外可偕游  
行雲不定陰晴色遮却仙家第一洲

寄語靈妃煖玉漿溫柔鄉卽白雲鄉  
便期汗漫九垓上更不振衣千仞岡

上圓通寺山頂

鬼宿餘光接太清五雲深處俯層城  
神山有馬移能至怪石如羊叱不成  
佛鎮蛟宮秋雨寂人臨鳥道晚烟輕



笑看歌舞筵前地一點彈丸井底橫

過承華園

花鳥淒迷落日遲黃蒿柱底訪殘碑可憐沈翠埋珠地  
不見分香賣履時異姓封王原有幸真人御世復  
何疑當年若守藩臣節帶礪河山未可知

憶圓圓

昨朝曾過承華園不見圓圓并何處人言商山古寺旁  
尚有美人數尺墓美人生死皆神仙不逐粉黛作黃土  
高樓一墜自千秋以責婢妾論亦腐兒時授讀梅村詩

殘燈耿耿聽秋雨梅村亦是前朝人風流學士枉自苦  
君不見道士樓上焚靈符飄飄雲中美入下

戲呈王宜泉同年

列子一死生莊子齊彭殤孔孟於壽夭亦復安其常吾  
豈不知之而乃問夫子顧性百年間所貴先知耳知晴  
不畏雨知東不誤西知燈路不暗知筏津不迷吾旣上  
下索鬼神皆聾啞如與七聖偕茫茫襄城野子口代天  
手授人筆之書吾命乃在子一索得自如我不圖作佛  
更不求登仙問君致大鳥是何龍蛇年好向青山上買

石種桃樹遍告後來人曰我埋骨處

五華山晚眺

層霄樓閣俯三台傍晚登臨亦壯哉樹色直隨山北向  
風聲欲挽水東迴憑將舊恨都消盡和就新詩始去來  
深夜不愁星月暗滿城燈火蚌珠開

鄰寺別徑重聞木犀香

重來不擾古禪關昨夜詩情半就刪隔院綢繆門未掩  
橫雲縹緲月初灣香深恐雜鄰家樹氣靜如經別處山  
有約明朝齊載酒襲人才到九分間

答陳仰山邀看桃花

歸燕翩翩暮入雲  
滿園秋蝶亂紛紛  
漁郎寄到仙人語  
春色朝來已十分

金碧中間一草堂  
居然五柳舊山庄  
歸來陶令餘風骨  
種得春花亦傲霜

不是嶠壺殷七七  
何緣紅樹美人攀  
只愁八月乘槎客  
錯認桃花水一灣

沈吟幾度日輪西  
繞屋羣芳色不齊  
記得曾經花樹下  
蒼苔滿地未成蹊

金碧草堂看桃花

仙人昨日遺尺素招我來作桃花賦我信仙人不復疑  
雲行水流相奔赴春光爛漫草堂開果見紅霞非一樹  
詩人酒客來如麀盡道誤入天台路前宵枕上聽秋風  
白雁一聲空中度如何此時有桃花半醉恍然知其故  
人間九十爲春秋仙家豈復授歷數少則五百多八千  
等閒度之如旦暮可惜劉郎不肯住匆匆阮郎同歸去  
出門桃花應笑人此間竟是憶鱸處

爲樂固坪題洗硯圖初藁誤硯爲墨固坪卽邀畫

者標目洗墨圖並書姓名其上愧余之多疏謬  
也復成一詩以志過

固坪有新圖其名曰洗硯要余題一詩乃以草薈先硯  
墨點畫殊衰老隨手便固坪不相非乃謂此義善郢書  
燕說之佛語下一轉遂邀畫者書圖名因之變牛馬惟  
所呼黑白終相戀我獨慚愧多不敢重撫卷恐彼畫中  
人笑我目空眩歸來汲清泉自洗石一片

題錢芷汀紉芷圖

晨門封人古有數驛官何至妨賢路郵亭冠蓋紛紛過

呂堰不是栖隱處故園修篁覆茅亭芙蓉菱荷悉芳馨  
上書投劾只一語衆人皆醉我獨醒歸颿道經沅湘水  
不怪屈子悲屈子當時未得同行吟每憶秋風紉江芷  
畫師有人記姓蕭閒情曾與圖離騷宋玉景差侍側否  
水波木落空無聊何似錢家畫一幅山中香草慰幽獨  
我亦朝暮襲蘭蓀可許卜鄰結小屋

同董竹溪楊西園移居僧舍卽扁之曰竹寄園爲  
詩紀之

杜鵑歸盡鷓鴣少客館聚處聽烏雅忽然厭說枕席爔

南移佛寺看拈花竹溪瑤琴假自友西園棋局輕於紗  
寄庵破書四五本家具如此難矜誇出門未曾隔一巷  
持載懶借東鄰車山僧早作怪石供閒以老樹橫槎杈  
清風盡屬我輩有明月不到他人家隨身床頭滿甕酒  
洗尊卽與傾流霞興酣自磨墨一石半毫犀利飛莫邪  
新居何可少大扁書竹寄園名亦嘉經旬聯床有勝友  
招來酬倡休咨嗟湖濱岳麓攬遺蹟屈指大半茅廬斜  
只輸仙人駢烏犢上坐仙姬抱仙娃大瓢在背杖在手  
烏雞白犬相周遮畫師臨摹喜易得粉本贗本紛如麻



此間韻事別無物一詩先就慚劉父廣川子雲恐笑我  
淨境無端又喧譁

中秋夜對月呈諸君子

山下望月月在山海上望月月在水山頭海角陰晴殊  
那得清光一萬里佳哉秋色平分時升天入地喜無私  
浮雲積雨偏生妬每教人間長相思十分得意有今夜  
一輪當空真無價昨宵猶在然疑間清晨渣滓已盡化  
客中借得山僧廬纖阿御出銀蟾蛛美人情生酌酒後  
名士味在彈琴餘自矜少年不如老老人見月出何早

從前幾度歌團圓未識可似此夜好轉思並坐月下人  
瞬息去踏長安塵玉堂雖然近天上回首家園恐傷神  
高齋固是昆明境分野同依鬼與井他鄉仍作故鄉看  
唱和休辭玉露冷

月夜上五華山聽段亮工彈琴

置身多在五華間名士風流尚可攀既有瑤琴宜卜夜  
縱無明月亦登山愁中秋興難爲盡謫後仙人易得閒  
一曲移情如海上宵分聽罷戴星還

題唐二南詩後

才調集中千首詩每於壓卷輒稱奇專家有技原非小  
名士無情不敢癡未到窮愁已如此將來成就豈能知  
平生縱使輕餘子也自逢人說項斯

寄賀張小東生子

得雉何以錫嘉名千里傳聞喜且驚如意原無過此事  
能言定復記他生漫因女好書分與不待甥賢宅相成  
聽說徵蘭私語夜西偏炯炯有長庚

是仙是佛是公卿我不隨人爲重輕但願來年仍再舉  
還嫌此日未雙生扶床愛女齊呼弟置膝佳兒早作兄

比較商瞿遲十載熊羆數夢自分明

賀陳仰山初度日得少子

丈夫愛憐其少子矧是同物曩無此有星大如半月形  
昏見於丁曉未已昆明老翁符壽昌太邱德望重州里  
吹笙鼓瑟金碧堂嘉賓燕敖接冠履秩雍內外環諸孫  
共爲老翁介福祉年年降日皆懽欣此日眉間色尤喜  
晏歸錯愕還不知夜半報道翁生子與翁同日真快哉  
翁年六十有六矣我於老翁同舉鄉生亦同年慶覽揆  
月日先我呼爲兄同官同方同歸止較量大略無不同

不同兄兮只此爾生平  
懶作躋堂人祝壽詩文  
夙所鄙  
早知多男是老翁  
悔不前日來酌兒賓  
筵同與聽啼聲  
錯書弄麀字滿紙翁  
之力能奪天工  
清秋爛漫開桃李  
盈枝古篆蟠屈多  
南山山色東海水  
蟠桃李枝爲東海南山字  
固知  
瑞應見一斑  
至竟何能盡厥美  
試看老圃黃花多晚節  
清芬世無比  
乃翁乃郎其如斯  
爲補詩傳百千紀

上彩雲樓

草茅心跡愧前修  
曾向祠堂拜武侯  
更有何人附名士  
重來此地正清秋  
眼空四面全無障  
身近層霄自可留

昆水華山今亦小  
只因已到綵雲樓

題育蠶課孫圖

仙人跨鶴今何之  
天上人間輕別離  
藏書滿樓手讐校  
有孫不得親授爲  
孫騎石麟自聲控  
寧馨不識誰抱送  
流涕賜硯大母前  
少孫雖弱不好弄  
大母育蠶多苦辛  
課孫正復乘青春  
桑葉在手書在口  
蠶腹孫腹皆經綸  
黼黻文章重聲價  
一朝冠履被天下  
丹青改作補衣圖  
華表柱頭慰鶴化

至古連然呈  
袁蘇亭

傳書魚雁亂紛紛才向關前度霽雲白髮雖然拘禮數  
青燈只是說詩文一生老氣知無敵萬古狂名許共分  
碧玉雲濤相待久明朝游興且先君

昆明池畔記吟詩觸手何曾落黑髭不改本來真氣骨  
終憐過去好鬚眉雲烟著錄如千載風雨聯床又一時

斗酒相煩謀小婦水晶鹽味少人知

蘇亭以校  
官督鹽課

呈楊碧泉給事

諫官未老早抽簪家住雲山深復深縱少田園羞吏隱  
況餘菽水慰親心望衡已信有人在隔岸幾疑無路尋

一見懽然如昨日新詩聽罷更聽琴

碧泉有譚詩不韻矧彈琴之句

游螳川短歌爲袁十三蘇亭作

今年不作螳川遊我輩幾被山靈羞人生一老豈復壯  
拚得狂名可千秋秋雨瀟瀟全不歇望斷關前碧雞月  
高人幸有錢芷汀後先泥塗疾趨謁西道一髯是王人  
紛紛俗客難爲賓前宵待我雲濤寺提挈詩家張松與  
陳秋浦城中見我笑不止兩篇新詩寫生紙乃是雲濤遲  
我吟我若早來君無此君言風雨近重陽待將郵寄東  
籬旁十三年前一老友竭來共舉登高觴人言髯癡癡



何負我道髯豪豪  
可妬詩成傾酒酒如池  
不曾殷勤謀  
小婦指揮錢劉下  
螳川一路巖壑皆天然  
名山亦欲得  
知已無端橫被人  
鏤鐫題壁籠紗却快意  
肯數韓孟昔  
聯句乃知天雨與  
天晴皆爲吾髯作詩計  
招我之詩不  
可刪待我之詩不  
可攀平生自詡長城後  
今宵縮手雙  
袖間紅燭高燒且  
穩臥疎鐘任向枕邊墮  
誰教夜半洪  
濤聲驚起夢中披  
衣坐一詩飛來自雲林  
五言味淡幽  
蛩吟轉憶仙人謫  
天上半潭碧玉情何深  
仙人興會原  
不小朝騎青龍下  
蓬島人間又見瓊琚辭  
甯鎮山門帶

其寶便期十日逍遙遊好詩盡讓吾髯優錢侯尙有詩  
中畫我於百事工無由別時秋風滿長路錦軸雕鞍載  
歸去一次相思一次看危樓深藏碧梧樹

遊曹溪寺

寺中優曇  
花尙在

磬聲何處落僧影出林中未問三潮水先尋十笏宮有  
花拈不盡得月指皆空老眼看碑倦迴廊曉日紅  
加餐香積飯訪古徧林邱老樹撐斜逕荒池浸廢樓仙  
人無玉帶使者有銀鉤楊許同千載狂歌且復休

九日任漢卿聞景明歐福先招同諸先生上太極

山登高

對面卽  
龍馬山

朱家高閣勢岫嶙不出城中已絕塵風雨最愁初到處  
雲山偏愛遠來人香醪乍飲心先醉舊韻重拈句未陳  
逕欲鞭笞龍馬背去看海嶽月華新

自大浦至江川一帶山中

暮雨宿荒山僕飢王亦倦第見深林鳥止集得其便曉  
行路滑滑衣裳盡泥濺垂老爲游人此中亦何羨忽見  
白玉龍飛舞急如箭前山怪石多不肯隨流轉一怒裂  
巨峽半空起雷電南北分揀天日月露一線直聳大斧

劈橫陳快刀剗瑣細肖萬形雕琢技各擅最好堂室開  
足張廣筵燕縱當風雨來不碍客游行行路雖艱辛造  
物固奇變道途皆如此萬里亦歡忭欲去且少畱溪邊  
安筆硯謝詩與柳記何以相後先

紀夢

十七夜夢一仙子以詩屬和不就仙  
日以待明日可也其詩亦不復記

題罷新詩未署名雲興風馭便西行仙家縱有崇朝約  
知在崑崙第幾城

五十詩成笑達夫紫毫璀璨眼模糊閉門一夜尋佳句  
十二樓前寄到無

荅張栢軒自竹園回訪不遇

與君相遇不應疏。又是瀕行賦別初。  
解組窮官猶避地。乘軒好友自迴車。  
門前凡鳥無題字。池上鮮鱗有寄書。  
若使當時能見面。清秋風雨興何如。

荅栢軒省垣再訪不遇

苴蘭坐待已多時。恨不西行且更遲。  
千里夢中同命駕。一宵客底獨吟詩。  
長懷霽月傾心寫。好與清風送口碑。  
我似輜軒車馬倦。瞻望華嶽亦神馳。

不得高密送行詩冊消息

海波渺渺寄相思望斷征鴻夢亦疑應恐衰年八萬里  
不堪淚灑送行詩

晚歸

凌晨植杖出城門看遍梅花又抱孫歸路東山多晚照  
何嘗氣色是黃昏

對梅花憶錢芷汀

黃葉秋風始別離玉梅早見此高枝世無處士獨稱絕  
君有孤標偏出奇散作花陰香在影縮成粉本畫兼詩  
百年萬里同舒卷夢到山村已後時

寄袁十三蘇亭

神燈鬼火影熒熒古廟荒涼戶半扃不使桓寬重作論  
仍教伏勝更傳經山川自古須文藻雲霧於今正杳冥  
老子亦知應有此秋風促予早揚舲

寄陳仰山同年

昨日松蘿嫌太早朝來欲赴草堂看鄉風驢背跨誰憒  
仙客鶴腰騎更難移入絹頭千樹易寄來竹外一枝殘  
夢中化作雙蝴蝶尙恐長途雨雪寒

寄段可石大令

山中畱得斯人在兩絕詩書評不差書則疾風吹籜葉  
詩如快雪看梅花先生原屬老名士同輩誰爲真大家  
獨向隨園稱弟子六朝山水伴烟霞

寄張月川

沈岡岐路首頻回幸得昆池數舉杯自逐仙人吟九日  
長憐驚馬望三台城東山名相思空視月盈缺一夢欲隨雲  
去來爲問御風亭畔樹雪中竹外幾枝開

兒子往山中改葬其婦連日雨雪懷思成吟

泥塗不在地雨雪不在天無晝亦無夜在我心目間萬



物皆分定達人順自然性情生恩愛遂爲所熬煎憶昔  
宰百里雨暘肅明禋毫釐公私判恐於禮義愆出入戶  
庭內詠歎形詩篇似見雲霧歛豁露東山巔

書春帖子得梅花一枝

夢向山橋取逕過醒來無耐雨偏多紅箋寫就宜春帖  
徃換梅花不換鵲

夫詩以爲技乎以爲道乎以爲技也則惟是研聲病究格律探風氣窺好尙以取悅人耳目斯已矣如不技之爲而道之爲也母乃沈潛乎道德仁義之旨體驗乎身心性命之歸閱歷乎天下國家之故察識乎人情事物之交非不得已則不言言之而非以徇人長言之而非以市名也乎經騷而降爲詩人者多矣陶與杜其最著者若韓若白其次焉然猶或病其鄰於直也或病其流於俚也下此而迂而腐則有得於道無得於詩矣於挾其技以遊者反得以取勝焉而傲之且侮之道固一

技若乎詩而道者道在而形之於詩也道而詩者道在而假之於詩也二者之間要自有分矣而終不得以技而廢乎道謂是固詩之本也今癸酉年計余所爲詩凡百餘首刪之存數十首然皆得之生徒課誦之餘賓朋酬應之間非有所謂不得已而言如古作者之爲也是則尙不足進於道而於技亦可知矣不存焉可也存之愧也序之滋愧也除夕日在五華山房漫書潭西劉大紳